

知
足
齋
文
集

知足齋文集卷第四

大興 朱珪 石君

墓誌銘

呂君慕堂墓誌銘

呂君慕堂卒于乾隆二十年乙亥越二十一年丙申其孤麟乃卜地葬君于長新店之西又十年丙午君配吾姊氏卒麟將啓君之阡而合葬焉泣而請于珪曰麟生未睟而孤及有知竊聞吾父之生平惟舅筭河公所作行略及吾母口述耳比葬未有銘吾母之喪舅旣爲之狀茲合祔有期敢請舅銘以不朽吾父母也君諱元龍

字鱗洲一字慕堂順天大興人其先世自河南遷京師
明末有名相者官千戶甲申之變守永定城門死之有
卒持其殘骨至東便門外瘞之舍中遂墳焉爲君七世
祖五傳至君考琬官太常寺典簿妣楊宜人生君君少
嗜讀書旣爲諸生念先世未嘗以科第起家必欲得之
以慰父母心刻苦勤學爲文章淡沈窅默窺江右羅文
止章大力之奧竄嘗斲木度棘闢矮屋尺寸坐其中呻
吟夜以繼日乾隆庚午遂以第八人舉于鄉再會試不
售嘔血而罷遂病病二歲而卒妻朱氏爲先考資政公
先妣徐夫人所生第二女與君同志相勸以日者推姑

千支歲行在某不利于壽憂之形于夢寐若躬禱于都城隍所請減己年以益姑算覺而屬珪爲文焚于廟中及君病誓以身代病亟矣欲先死之吞金約指二旋下乙亥正月三日君病彌留家人益防之十六日向明竟投繯于戶上樞人覺而解其懸氣不絕如縷越日而蘇咸責以事親撫孤大義領之乃稍復常事舅姑皆以壽終教子麟以諸生考職主簿鄉人上其事于學大吏以節孝請旌得

旨呂朱氏准其建坊入祠今年正月六日以疾卒君生于雍正三年乙巳四月二十三日午時年三十有一孺

人生于雍正四年丙午四月二十日巳時年六十有一
子一麟娶胡氏繼娶李氏女五旣嫁者二一通戊子科
舉人分發山東知縣天津沈以顯一通候選州同通州
劉錫光皆卒其耐也負庚面甲兼卯酉分爲乾隆五十
一年四月十二日酉時銘曰

勤學不壽其監不朽苦貞不享厥光鬱上儷于藏孔長
庇其根以昌

敕封儒林郎邵翁墓誌銘

編修邵君瑛將奔其封翁景載先生之喪持所爲行述
泣示珪而請爲銘珪辭不獲且知先生之勤學教子者

不可沒也先生諱陞陞字梅林一字景載浙之餘姚人
曾祖以文祖籲俊本生祖三俊父思慈世爲縣學生思
慈能文年逾四十而卒時先生生甫四十日初先生之
娠也生母張夢月入懷及是母子暨張兩嫠抱數旬之
孤承兩世之重不絕如髮比長受業同邑黃敬菴之門
本洛閩學而飾之以經義史志所讀書必經手錄而識
各家疏解于上方旁行皆偏年二十有三入學爲諸生
旋丁嫡母憂屢不就試歲丙子舉于鄉不旬違生母養
嘗一上公車不第歸遂授經于里訖不出其學尤長于
經如釋周禮樂師舞引春秋初獻六羽駁鄭注宗廟以

人之說据學記三王祭川先河後海公羊傳三望祭泰山河海駁大宗伯賈疏禮無祭海之說据周禮夏官羊人凡釁積其其羊牲牛人無其文證孟子釁鐘本用羊不用牛之義貫串而折其中其大略也子瑛玠皆秉其所口授故瑛最精于樸學甲辰會試以第三場對策核瞻得雋 殿試珪與讀卷官奇其策典實而茂蔚徧示諸公皆以爲異等擬進

上覽而嘉之以誤書一字置一甲第二名人以爲先生之德業不大鳴于身而昌其子也傳者或云先生教子甚嚴幾于過情珪聞嘗詢之瑛瑛肅然曰瑛父嚴而實

慈瑛自幼體弱凡飲食藥物父必手檢而詔之曰吾非
爲汝爲汝大父母也大父四十年苦學大母六十餘年
苦節而汝不自愛自力耶珪乃益歎先生之孝也于是
恭遇乾隆五十年

覃恩瑛請以己官貤贈祖考階儒林郎妣于生妣張皆
安人先生善事其母張太安人年八十有七有孺子之
慕生平儉于己而嗜義若渴族有孀婦某貧而有志周
之二十餘年以成其節先生生于康熙五十五年丙申
十一月十八日戌時卒于乾隆五十一年丙午二月二
十九日亥時年七十有一丙子科舉人

敕封儒林郎翰林院編修加一級配朱安人先卒繼室
俞安人子二瑛庚子科舉人甲辰科進士及第翰林院
編修加一級三通館纂修官娶俞氏玠貢生娶方氏女
子二一通縣學生谷鶴一通太學生朱起齡孫六器之
習之用之瑛出牧之進之立之玠出女孫四某年月日
葬于某銘曰

考菑畬子滿車孝廉竭蹶昌汝閭曰馮陽闕生喬如康
節伯溫世厥家

章淳菴墓誌銘

歸安章子琴聞其本生祖淳安府君之赴哀甚泣而請

于珪曰吾祖行敦德于躬施惠于族黨潛曜習爽耄耄
不倦非公曷闡于不朽予習知章子之誠篤非阿其親
者案狀府君諱通翰字萼懷號淳菴其先自會稽遷歸
安之荻岡邨家焉父諱紘勳有子五人府君之兄曰靜
國仲韶弟曰呂涯碧軒父善病府君侍起居最謹年十
八喪父以家計支絀遠賈于閩粵暨楚南北歲饑買米
平糶乃獲倍息歸之于兄無私蓄弟呂涯卒遺孤五撫
之若己子所居鬱攸府君有別業不肖獨遷曰如孤姪
何兄靜園卒屬其子西庚于府君西庚又卒覆翼其孤
迄于成立曰吾懼無以見吾兄于九原也兄仲韶卒無

子以長子某爲之後勤學不祿實生苓乾隆癸卯科舉
人繕書四庫館議敘知縣克秉府君之教以道自淑府
君晚而好道孜孜于善周人之緩急病予之藥死則施
之棺助窆自奉褐衣疏食而已齒雖耄凡祠墓事必躬
親乾隆五十一年丙午正月十三日卒年八十有一鳴
乎可謂旄期稱道不亂者歟生于康熙四十五年丙戌
六月二十二日太學生妻朱氏兵部主事泮功女子三
女二孫十二曾孫十二某年月日葬于某銘曰
歐餘刻施餘不泚泚鬱霞流英津其根莖以擊爾佳城

太學生黃存菴墓誌銘

歲辛丑予案郡邵武試古學有建寧黃宗健能爲五七
古數十韻遂首取之明年科試復擢冠其學補廩生送
入鰲峯書院肄業予使旋甲辰宗健奉其父存菴之命
就學于京師入太學今年七月宗健聞父喪慟絕曰吾
乃以學遺其親予憐而解之曰此昌黎爲歐陽生言之
矣生豈可致毀以重死其父乎于是宗健稽顙泣請曰
死無以報吾父惟吾師哀而銘之則死且不朽君諱岡
字東壁號存菴考諱孫香之次子出後其弟孫安孫安
沒其妻彭年二十有七矢志撫孤卒年六十有六守節
四十年君養其志終身無間焉君少讀書有聲于庠會

同里某斫其族山宰木族人亦斫某之山木以報訟于縣縣察其情不直某某夤緣于郡郡以縣訊不平勘之君本生父將爲獄首禍不測君奮然曰兒當之遂挺身投吏吏案牘叱曰牘首名孫香汝何爲者君曰此吾父也父實老病不能斫某木固岡斫之願伏罪吏大恚詈曰汝以衿不畏死耶君曰死甘之畏吾不來矣遂褫衿就繫孫香以免獄旣具于是桂林陳文恭公撫閩平反之釋君歸母彭喜而泣曰不意吾母子生相見也君于是入貲爲太學生閉戶不出惟嚴課其二子曰庶一雪我恥長子宗修先入學從其鄉朱梅崖先生肄業于

養峯書院梅崖引以爲可與言而爲君作六十壽序宗健復耆學進取觀其兄弟之征邁不己以期無忝所生者可以知君之教矣君卒于乾隆五十一年丙午四月七日生于康熙五十三年甲午六月八日年七十有三妻鄧先卒子二宗修宗健女子二孫五尙譜尙訥尙識長吉長慕某年月日葬于某銘曰

代父叢棘非其復貽子學殖非其得火傳薪熄後將食爾德

太子少傅

經筵講官東閣大學士兼戶部尙

書

贈太子太保諡文定梁公墓誌銘

乾隆丁未秋八月大學士梁文定公之喪歸于浙適珪將案試湖州遇之于塘西旣哭公于舟其孤以公年譜泣而請銘珪不獲辭案梁本廬姓其先出于伯翳由新昌而遷于豐山之梁巷邨者曰國鎮公稱東梁至公十有七世爲會稽人曾祖諱廷仁祖諱一能考諱文標官刑部陝西司主事後皆以公貴累

誥贈如公官妣陳太夫人初公考官刑部司獄恤囚有陰德曰彼自麗于法耳何爲庾苦之下獄者皆德梁君已而生公諱國治字階平號瑤峯有兄國泰早卒事嫂馮甚謹官戶部侍郎時以己官貤封焉公年十歲居陳

太夫人喪如成人十四以制議書法見賞于學使崔公
紀籍順天通州入學第一人十七丁外艱十九舉乾隆
辛酉科鄉試明年考取內閣中書改歸本籍戊辰會試
中式 殿試一甲第一名

賜進士及第授職修撰珪登公榜同爲翰林官未幾以
繼母吳太夫人憂歸乾隆十六年散館十九年遷國子
監司業二十一年充丙子科廣東正考官復

命奏對稱

旨命往廣東以道員用明年補惠潮嘉兵備道二十六
年恭祝

皇太后萬壽至 京以卓異引 見

特旨署都察院左副都御史公以巍科清望出試吏事至是超擢卿貳聞者翕然明年主壬午科江西鄉試旋視學安徽擢吏部左侍郎三十年調江蘇學政提唱羣雅鑑別茂異江南北士蔚然宗之會以署廣東糧道失察折色事牽連落職就勘明年事白授山西冀寧道三十二年授湖南按察使時珪司臬湖北公道經武昌登蛇山巔浮白談契闊終日不及塵塼事三十三年授江寧布政使明年擢湖北巡撫兼署湖廣總督及荊州將軍印是時官兵征緬甸振旅過境公躬勞拊且鎮之序

行無譁奏定施南府屬宣恩來鳳咸豐利川學增額有
差三十六年調湖南巡撫公以經術勤吏治清風惠氣
不燒以孚三十八年

特旨內召直軍機處署禮部侍郎珪致書于公曰閣下
以封疆大吏入贊密勿願以清吏源培民脈端士氣三
言爲獻公不以予爲迂也三十九年

命直 南書房補戶部侍郎自是

召對扈從無閒昕夙充 經筵講官

賜紫禁城騎馬第宅冠服之 賚便蕃有加四十二

年典順天鄉試擢戶部尙書四十七年加太子少傅明

年以原官協辦大學士歲庚子甲辰再以扈

駕南巡

賜假省墓鄉黨榮焉五十年與千叟宴于 乾清宮殿
上夏授東閣大學士兼戶部尙書公以文學受

知在

帝左右敬慎縝密寵利不居潔躬沖度粹然儒者在昔
有宋龍首入黃扉者九人有明一代十有七人而我
皇臨御五十餘年以來邁其三焉公躬際

文德武功之盛雍容大雅退食澹淡有不愧讀書宰相
者其天性學養皆不可及也公體素清癯五十一年仲

冬望日疾作

上遣醫官暨侍衛傳

旨存問越月十三日壬子考終奏聞

上軫悼晉贈太子太保

命皇子往奠賚白金千兩治喪

賜諡文定公始終承

眷惟其端醇勤慎信之者深也詩文著錄若干卷彙藏于家配徐夫人生一子和凝先卒筵席孺人生子五承輿議敘州同爲世父後卒承雲

欽賜舉人承翼卒承綸承福女幾人孫幾人某某公生

于雍正癸卯年十月二十一日卯時終于乾隆丙午年十二月十三日巳時年六十有四某年月日葬于紹興南門外乾溪之五台山銘曰

文曜降斗麟題鳳苞守器在廟天球赤刀元功無名太美不佻當無有用去來逍遙芘爾世德稽山之椒

顧治齋文學墓誌銘

歲丁未春太倉顧生張思介錢少詹辛楣書謁予于杭書言生耆學志古予留館之佐校歲科兩試生早夜斷斷著讀書隨筆若干卷于經史諸家鉤沈索隱真能嚼咀其甘苦者間窺其案頭舊書鉛黃填錯詫之曰此何

代枕中祕耶生愀然曰先子手批也先子于書無所不
治潛德未曜思不能表章遺書惟窳窳之碣得有道而
能文者一言則思死且不朽思願執贄爲弟子珪辭而
勉爲之文案行述君諱成志字心勿號治齋顧氏族有
二韋顧之顧己姓吳郡之顧姒姓初少康庶子無餘封
於越暨漢封東海王搖之子期視爲顧余侯子孫以爵
爲氏陳黃門侍郎野王之第二子鴻南封寧遠侯十數
傳至宋宣和中有蜚者官于朝後從南渡其子淡由光
福再遷崑山之新安鄉爲太倉始祖十傳至松霞公燕
詒明崇禎戊辰進士官至浙江右布政使君之曾祖也

生光復康熙辛酉科副榜貢生其子衍縣學生康熙中以通奇門算學供奉 內廷有子六人君其季也自櫛櫛育于西谿張氏西谿君諱誠無子撫君甚慈君幼有至性四歲遭張氏庶妣嚴之喪稽顙拜客如禮年二十以張姓入太倉州學屢試高等補增廣生後以督學嚴查冒姓乃爲文泣告于張氏祠誠子孫世世以張爲重名且自營壙于西溪君墓側曰四時祭埽必秉承二姓作誠子詩曰生依死不離其不負張氏撫育之仁也與同高祖昆弟行人陳埽講治心之學乃自號治齋爲文原本經史不見售于有司貧無以爲家晚始卜居西

塘有樹有池老屋三間名曰稻香結西塘吟社著錄益
富凡十數種藏于家考訂之學宗其族亭林先生何顧
氏之多學者也君生于康熙五十六年丁酉三月八日
卒于乾隆四十八年癸丑五月十六日年六十有七美
鬚髯體中而豐妻任生子三張毓張思州學生張傳州
學生女子一適國子生王春孫五張森張姓張翰張同
張崑乾隆五十三年正月十一日葬于古塘北張氏西
溪府君墓左從君志也銘曰

山叟室謀行屋闢厥父菑田子播治君家壁立百城歸
虛牖延白脈望肥顧則異己經埒韋寔楹將大稽古輝

浙江督糧道陳君墓誌銘

公陳姓諱夢說字象臣又字曉巖絳縣之陳邨人先世自洪洞來遷祖諱元善增生勲贈奉直大夫刑部安徽司主事加一級祖妣李勲贈宜人父諱瑞

誥贈中憲大夫禮部精膳司郎中加二級母孫

誥贈恭人奉直公中憲公皆授經于垣曲之劉張邨遂家焉生君子劉張邨其夕母夢明月墮窗前光照一室故名君曰夢月其後據名不以日月之傳易今名蚤穎者學十歲還家于絳十五同縣李恭人來歸中憲公率君躬耕田間日耕且讀書食則觀書于側母呵之曰久

不將斜汝目耶夜望見室中鐙火苦禁之君竊以布帷掩其光遂通諸經年十八喪祖妣李盡哀歲乙卯年二十二入學爲諸生丙辰舉于鄉庚申父母相繼卒君哭之毀戊辰中會試式出華陽顧庶子汝修房與珪同年同門其撥入本經房師則長洲沈編修慰祖也 殿試賜同進士出身以主事用試刑部河南司君性介不妄與人交暱初或疑其隘久而彌摯尤勤于守官在部時讞決必比律協情不阿上官意嘗與諸城劉文正公諍五日而卒不易所擬文正公心躋之歲癸酉補安徽司兼提牢事早晚親行獄役不能爲姦而囚無苦虐少司

寇無錫秦公察而嘉之歲甲戌擢浙江司員外郎乙亥
李恭人卒丙子京察一等十月陞禮部精膳司郎中
明年四月護送暹羅國使臣抵粵有入粵紀事戊寅兼
儀制司繼娶朱恭人記名御史辛巳以繁缺道府記名
六月

簡授寧紹台道未抵任巡撫莊公檄閩紹興朱家渡海
塘君議當修復從之癸未台屬寧海上下梅邨有拒捕
案提督將以兵往海旁邨民皆驚竄君謝之輕騎行縣
令已縲繫竄者數十人下之獄君曰此非犯者我來捕
梅姓數人而已駐停旁盡獲之釋其少子一人台人謠

其事曰存孤記遂改停旁爲海防同知治所勸修鄞之
錢湖牘乙酉

上南巡

召見曰夢說爲刑曹素知其能

賜綺貂是年八月天台水勘賑之明年以所屬諸暨令
不職罷吏議送部引

見仍以道員用撫臣奏請督修浙城工丁亥

特旨授浙江督糧道卻餽金漕政肅然戊子有譌言翦
髮事蕭山捕得僧了凡等四人誣服君平反之明年或
言事起于浙以犯解京訊無他而抵捕者罪君以輕比

議降一級修餘杭南湖隄填其潭署嘉興府嘉興訟錄
君釐之無畱牘壬辰署嚴衢處湖各府事甲午復元官
君在浙十二年有歸田志遂自號西崦勵夫請假歸明
年卜居山泉之旁號枕泉居士戴笠芒屨與鄉里道舊
故優游林居者十年甲辰示疾考終生于康熙五十三
年甲午七月十二日子時卒于乾隆四十九年甲辰十
一月晦日午時年七十有一元配李恭人勤儉仁恕中
外稱賢子四鍾雲國子監生鍾霞貢生皆恭人出先卒
鍾雨側室唐出鍾雲側室戴出女子三孫二鍾霞生毓
寧爲鍾雲後鍾雨生毓揚爲鍾霞後曾孫一道瞻君仕

優好學所著各集彙藏于家葬于某原其孤寄書于珪
曰先公同年之在朝者惟公巋然獨存敢乞銘銘曰
君面冷而中慤交久孚而憺怕周紀于浙聲濯濯十年
枕流絳居樂我文非樊璞可琢

致仕鎮守雲南楚姚蒙景等處地方總兵官世襲
三等子 誥贈振威大夫浙江提督陳公墓誌

銘

乾隆丁未春珪案試寧波識提督陳公公儒將也試畢
偕予會食坐未半聞母李太夫人有恙跽蹐不能終食
予心慙其孝明年春予以科試再至寧波而公已居憂

泣告于珪曰大用早孤賴兩母夫人扶先公柩殯于京師暨大用待罪登州遭繼母惠太夫人喪將歸合葬于寧夏次西安聞石峯堡回不靖諠當執戈乃卜葬于長安城南之沈家橋以待

命未暇勒石也今生母李太夫人見背行將耐于陝敢請銘案家傳陳本江寧人其上世不可考曰明德生孝孝生尙智明末官榆林副總兵與流賊戰死之葬寧夏遂籍延綏是生忠愍公諱福國初以武舉起家歷官至夔州副將擢寧夏總兵是時吳三桂反王輔臣據平涼公家屬猶畱重慶三桂質而招之三斬其使以

聞

聖祖嘉其忠授陝西提督平花馬池進攻固原降卒潰
遇害

特贈公爵世襲三等子例傳九世以其弟壽之子世怡
襲蜀平壽入川求得公妻黃子世琳于山中世琳襲爵
官至古北鎮總兵官入爲鑾儀使是爲爾謙公之考妣
錢太夫人公諱益爾謙其字也襲爵三等子雍正八年
以侍衛授直隸固關營參將出征北路鄂爾坤乾隆八
年授福建延平協副將擢雲南楚姚蒙景鎮總兵官以
疾致仕行抵長沙卒于館有子大用尙幼乾隆二十八

年襲爵今官至浙江提督初公娶高夫人雍正十三年卒時公方有事于北路殯夫人于寧夏地震遂改葬焉繼室曰惠夫人生女一側室曰李夫人生大用夫人清苑人兩夫人賢克撫孤以長以教底于大成大用不知其孰爲所生也大用旣貴疊遇

覃恩兩夫人皆

誥封子爵一品太夫人孫三均坊壩公生于某年月日終于某年月日年若干歲惠太夫人生于某年月日終于某年月日年若干歲李太夫人生于雍正丁未年七月二十六日終于乾隆戊申年二月四日年六十有四

先是大用既合葬公暨惠太夫人于長安旋拜提督浙江之

命入

覲以寄葬父母于陝故陳奏

上曰陝甘一省無不可也某年月日祔葬李太夫人于公墓銘曰

公侯之孫忠孝家大江西溯河流遐長安每每麟辟邪松根伏苓藏孔佳

宗人府府丞曹公墓誌銘

珪聞慕堂先生之赴既悲老成同志之凋謝而編修錫齡昆季以書來請爲誌銘珪不得辭公曹姓諱學閔字

孝如慕堂其號也山西汾陽人曾祖復琦祖應璽父曰英皆以公貴

誥贈中議大夫太僕寺少卿加一級曾祖妣靳祖妣司樊母王皆

誥贈淑人兄弟四人公居次三友于兄弟命錫齡以其官貤贈兄學會爲翰林院庶吉士又貤贈兄學思爲翰林院編修命祝齡爲弟學雍後公幼多奇兆乾隆六年辛酉舉于鄉會試報罷游江浙名山水歸而設教里中勵志講學甲戌成進士改庶吉士庚辰散館授檢討充武英殿功臣館纂修官辦翰林院事二十九年授河南

遷監察御史三十三年遷刑科給事中歷巡視西南北
城己丑充會試同考官三十五年轉吏科掌印給事中
公爲言官條奏事皆體要可施行三十七年授光祿寺
少卿明年遷通政使司參議擢太僕寺少卿甲午充順
天鄉試同考官四十一年稽察右翼覺羅學四十三年
以復申舉人會試請由州縣達部擢部議降三級四十
五年補鴻臚寺少卿前後扈

駕熱河

召見垂詢

上知公樸誠也四十八年遷內閣侍讀學士甲辰充武

會試同考官先是公爲御史上言宜考古制建辟廱于
國子監部議未行至是會

天子將臨雍發

睿思

命大臣規濬園水禮樂備舉

上憶及前奏

特旨嘉獎曹學閔能獨抒所見其建白亦不可沒有缺
卽請旨陞用眞異數也五十年正月預 乾清宮千叟
宴

恩賜便蕃五十一年正月超擢宗人府府丞復

命稽察右翼覺羅學是時公子錫齡在翰林有聲方督學雲南祝齡孝廉侍左右初公起家寒素以開濟自許與人交上下剛柔動靜無所不當時地利病口辨手畫井井有條目可措置雖富貴儉約如諸生及年過六旬反而講求性命之學泊然宵默幾于靜得公與先兄竹君同年進士與珪同館居同巷晚而交益摯每淡夕來危坐相對閒則邀予至其齋疏食清談蓋不愧素心晨夕者孳孳爲善不倦修山右三忠祠宣武門外椒山先生故宅祠及三晉會館南新門外義園永定門外掩骼會皆躬親襄舉擘畫可垂久性既恬淡官宗丞之年十

月以上氣疾奏請解任調理奉

旨准以原品休致明年春錫齡自滇歸公儵道士院課
孫養性手書寄珪猶以精進相勸所著詩文彙藏于家
晚作多心得近道者是冬感風寒疾端坐而逝蓋乾隆
五十二年丁未十二月八日丑時也生于康熙五十八
年己亥十二月十三日子時年六十有九配同縣任淑
人白首相賓有內則子五成者二錫齡乾隆乙未進士
翰林院編修記名御史祝齡庚寅舉人議敘知縣爲叔
父後孫八汝淳汝濶汝淵汝沆汝洵汝涵汝藻汝淳女
一女孫五某年月日葬于某所銘曰

木之材爲杗爲舟木之神宜山宜邱材于人乎有益而無害神反其天平與造物者遊是一非二吾以谷莊周

鄭敬夫墓誌銘

蕭山鄭君豹文館予冠山伯兄家間借予插架通志堂經解日夜手鈔不輟予心嘉其耆學之勤也聞其尊人敬夫先生病而好學齋志以歿其母吳孺人教其子尤切君旣發科而有志于古蓋能善體親志者已而聞赴歸將合葬其父母而泣請予爲銘曰不孝不獲顯揚表彰吾親然得立言之君子爲闡其幽光則是吾親可不朽于九原而不孝之罪稍釋君鄭姓諱崇禮字敬夫其

先由遂安遷蕭山居城中曰鄭家街父斯美貤贈修職郎山東兗州府經歷母沈孺人生子三君其長也幼讀書患痰喘疾及壯而劇間旬日則發發卽上氣不得息旣喪二親孺慕夢中嘗呼父母不絕聲妻吳氏同縣人善事夫子調養其疾病無怠有子三而督其次子豹文讀書以繼父志先生年五十而卒卒後十八年而豹文舉于鄉其母曰汝父不獲見汝之捷然汝無以是爲足慰汝父也汝家先人東明公所著見聞日錄嘉言懿行具在汝以是爲師則足以慰汝親矣豹文識之不敢忘又十年而吳孺人以疾終年七十有五先生生于康熙

五十二年六月四日午時卒于乾隆二十五年二月二日辰時孺人生于康熙五十一年十月二十九日戌時卒于乾隆五十一年八月十一日子時子嘉謨江西大庾縣小溪驛驛丞豹文乾隆丁酉科舉人樂武先卒女二孫四耀宗嶽宗敦宗聯宗孫女六某年月日合葬于某銘曰

寧移山而搯搯毋掘苗而本厯鄭君有後勤屹屹爲菑爲畚興也勃有如不信視此碣

武定府知府徐君墓誌銘

君諱觀孫字用賓號雪崖徐姓初自越北遷京師爲宛

平人家于天津考諱某候選州同贈朝議大夫君其長子也年十四妣王恭人卒十八入府學廿七舉雍正乙卯科鄉試乾隆八年以知縣揀發廣東借補電茂場鹽課大使充癸酉科鄉試同考官任滿舉最丁父及繼妣胡恭人憂服除廿五年補廣西恭城縣知縣兼署平樂府同知暨平樂縣事陞吏議引

見仍以知縣用揀發福建署永福惠安二縣及汀州府同知事補連城調漳浦卅三年三月縣民盧茂謀作亂君先期揆知賊要害督兵役往扼之賊旅拒用鎗踣賊三十三人擒其魁鞠餘黨爬梳滌狹甦梓刷剗全活者

無算民有畏辜絕姻者廉其情卽與胖合是役也君能鋤惡于芽而無滋蔓

天子韙之有

旨送部引

見擢同知未浹日授廣東惠州府知府異數也後任山東武定府四十九年年七十有七致仕明年與千叟寡拜

賜如例五十三年六月二十七日壽終于家年八十娶陸恭人繼娶趙恭人子三如源河南開封府同知如灝以州同借補揚州府經歷汝瀾乾隆庚子科進士孫八

彙吉東理集岡榮符榮轉枋詔榮範楓蔚女二女孫四
君之爲令于閩也予爲閩臬知君能其官及君平漳浦
之亂適予司臬湖北治荆門州孫大有獄與閩同日予
有姑之子許廷基在君幕中爲予道其事頗詳以是知
君賢君之子如灝使來告哀且請爲銘不獲辭某年月
日葬君于某銘曰

薤菴不興尹之能老守治郡去有聞大年陪敦蕃子孫

內閣典籍

誥封榮祿大夫尹公墓誌銘

松皋先生考終之明年春其孤閣學公致書于珪曰壯
圖不祿喪我先大人惟銘幽之詞非公莫光敢泣請珪

與先生父子前後同館翰林與閣學公同官者三年而先生爲竹君先兄鄉會同年友故珪知先生稍詳不敢辭先生諱均字佐平號松皋尹爲周之著宗本河南懷慶人前明有諱革者官給諫抗疏謫雲南太和丞子孫遂籍蒙自數傳至諱文燦康熙丁卯舉人兵部主事爲先生祖諱宗梁康熙丁酉舉人廣西桂林府同知爲先生考後皆以閣學公貴

誥贈如其官桂林公娶王夫人有五子先生次三性專一耆學桂林公教之嚴每日午刊綬香灼之試文一篇必成成必當公意年十九入學明年以第一人補廩屢

見知于學使者桂林公欲試以事治宅使督作者先生
挾一編讀其側公笑而不怪也桂林公病瘡先生侍疾
日夜甚勤叩額籲天血被面不知旣喪父殯于松皋墓
地去城六七里晨則歸侍母夕則往寢于殯廬三年無
間故自號曰松皋居士乾隆十八年舉癸酉科鄉試明
年甲戌成進士改庶吉士丁丑散館歸班援例改內閣
中書奔母喪偕伯兄增崎輟歸歸而兄又卒哭之左目
眇其廬母殯也如考將祔葬于白雲山大雷雨先生獨
執紼哭不移次乃克葬歲丙戌壯圖成進士改庶吉士
先生亦來京師己丑補官中書而壯圖改官部曹出入

則同一車先是珪與竹君兄同官翰林有兄弟同車之
嘲然當時士大夫官京師者不炫耀車馬識者猶賢之
四十年由典籍記名以主事用四十二年京察以年老
罷是時壯圖已官御史三年矣遇

覃恩封先生如其官其後壯圖由太僕少卿超擢內閣
學士扈

鑾蹕屢典鄉試五十年正月

天子開千叟宴于 乾清宮先生名入奏

上詢壯圖曰汝父年幾何壯圖謹奏曰七十

上微哂曰少朕三年不爲老也是時先生受榮祿大夫

一品封服其冠服入宴丹墀左翼鑠甚

恩賚便蕃觀者榮之先生性淡泊雅不自矜與伍夫人齊眉相莊日授諸子姪暨諸孫書或作制義自娛其同年老友間爲清譙皆呼爲太翁太翁云珪嘗會先生于曹慕堂宗丞家尊先生曰同官之父也先生遠巡執館閣後輩禮甚恭珪笑曰昔申徒嘉呵子產曰先生之門而固有執政焉如此哉何如兩忘而以齒遂終食作素心談甚歡也先生畜德識厚赴人之急不辭難故鄉黨甚德之乾隆五十二年九月朔以疾終于京邸其生以康熙五十八年八月十六日春秋七十有三配伍六八

子五壯圖丙戌進士內閣學士兼禮部侍郎會圖增生
全圖廩貢生慶圖健圖皆國學生女二孫十四佩珩佩
環佩典佩恩佩璲佩弦佩宮佩箴佩炎佩銘佩鋒佩訓
佩魚佩綬女孫九某年月日葬于某銘曰

盤盤雲龍淙淙黎江達流無涯孕靈信缸慶積厥家而
昌于邦千秋茲原匹阡于瀧

上書房行走禮部左侍郎加二級金公墓誌銘

嗚呼珪何能銘吾師耶蓋自丁卯以來四十年門生勵
有存者珪何敢辭公金姓諱甡字雨叔號海住先世由
會稽遷杭爲仁和人曾祖諱明遇江南興化縣主簿祖

諱星瑞雲南師宗州知州考諱惠慶三世竝以公貴
誥贈榮祿大夫曾祖妣褚祖妣朱聞人妣嚴皆

誥贈一品夫人兄弟四人公次三行六伯諱虞康熙庚
子舉人歷湖北孝感山西蒲縣知縣所稱長孺先生者
也長孺先生以文雄于浙長公二十有二年以兄兼師
及公學大成遂競爽焉年二十一應縣試冠其曹入仁
和學爲諸生明年癸卯舉于鄉會試報罷歸益肆力于
經史自司馬遷以下諸史窮年點勘數番不輟旁及他
子集皆手錄考訂故其根柢之學其邃焉歲戊申秋母
夫人感寒疾暴下殆甚公在外聞之狂奔歸中途籲天

願手寫華嚴經全部歸而母僵臥氣息縷縷公俯首入
衾以口鼻熨其臍嘻呵之良久腹中有聲稍安眠乃投
以藥竟愈于是日課平書經閱十二年而訖功其誠孝
也公淹公車者二十年中間客游山東者久之歲甲寅
丁外艱丁巳奔母夫人喪力疾行抵臨津挈囊趁舟躡
折一齒困甚時長孺先生自孝感歸卜葬考妣得吉壤
于南山之普福嶺乾隆六年秋以錢塘梁文莊公薦授
國子監學正明年壬戌會試中式第一人闈卷進呈
上屢稱可之殿試一甲一名進士及第授職修撰甲
子主廣東鄉試乙丑散館一等一名教習庶吉士丁卯

充順天鄉試同考官珪卷出公房既定第六名撥入湯
葯岡先生房先生爲公壬戌同榜揆花邸寓橫街與公
對門珪謁葯岡先生曰子固我同年金海住所薦也嘗
謁金師珪叩頭公進而教之甚至明年夏署

日講官起居注又明年遷右贊善尋轉左十六年實充
講官興縣孫文定公秦充御纂詩經館纂修王申

副漳浦蔡葛山先生典江西鄉試是夏六月

御試翰詹二等擢左庶子冬授侍講學士明年癸酉主
山西鄉試甲戌充會試同考官奉

命督學安徽公校士公勤竟日坐堂皇披閱巡行士習

帖然任滿二十二年奉

旨任 上書房行走冬授詹事府詹事自是直講席者
十七年直諒誠敬所陳說必正義法語于學行根本尤
惓惓三復以是 諸皇子 皇孫皆心重公公之品學
真不愧是選也乙酉奉

命督學江西請假由浙展墓乃赴任明年授內閣學士
又明年擢禮部左侍郎三十七年奉 使祭告南海
時公子三吾作令于粵東得侍左右公扈

駕謁

泰陵暨

南巡者各一木蘭者七賡歌之作成帙三十八年五月
當從

蹕熱河邁疾仆于直次諸城劉文正公以 聞

予假秋九月奏請解任得

旨准其回籍調理明年秋疾瘥乃得出都 諸皇子

皇孫及同直同朝諸公皆贈以詩歌比之二疏有餘榮
焉丁酉入京謁

孝聖憲皇后梓宮再詣 書房與 諸皇子 皇孫執
手相勞

上賚大緞

命卽歸越二年撫臣奏主敷文書院講席四十五年

上五幸浙江迎送

駕問賜有加于是講課之暇常羊湖山與錢嶼沙方伯
吳崑田編修諸公皆幡然達尊爲五老六逸會旬月無
間賦詩談讌鄉黨望爲神仙珪己亥典閩試庚子視學
于閩過杭再謁公公偕顧河干先生飲珪于西湖舟中
神明縝密杖屨從容珪竊歎以爲非學養之深厚不能
及也公生平廉儉方正處事無鉅細井井有法度詩文
數千篇無體不具尤長于使事在直廬與陳勾山諸公
倡和限險韻數十疊不懈益彊辛丑開八袞作長律八

十一首該贍精警不減少壯性篤于孝友事兩兄暨一弟肫如也至于族戚年家若吉凶緩急謀之竭忠不愛己力其取受必以義雖一介不苟此珪所心折于吾師而亦非一人之私言也壬寅秋以疾考終公生于康熙四十一年壬午八月十五日亥時終于乾隆四十七年壬寅七月九月寅時壽八十有一配王夫人先公卒誥贈一品夫人繼室胡夫人

誥封一品夫人治家協德乾隆五十三年五月八日壽終年八十有五子三三事先公卒三吾乾隆丁酉科舉人廣東四會縣知縣候選郎中三俊太學生議敘鹽大

使女子四長適國子監學錄王君喆次適吏部文選司
主事汪君孟錫其次子修撰如洋庚子會試 殿試皆
第一克繩公武云次適泰州運判姚君思康次適監察
御史汪君日章孫男二萼萼孫女六某年月日合葬于
某銘曰

斗魁戴匡厥象正方公秉其氣不嚴而莊讀書萬卷老
而不怠引年考造湖山輝光有老門生校文公鄉銘公
冢石擲筆涕湧

太僕寺少卿加三級戴公墓誌銘

乾隆丙午秋珪與戴編修心亭典江南鄉試爲心性交

先是壬午主江南試者君之父篋圃先生最稱得人庚子君之季父編修均元癸卯君之弟修撰衢亨相繼司衡與君而四天下豔稱之越戊申君卒于湖北學政任珪聞而悼歎若失今年夏篋圃先生率修撰君扶彭夫人之喪過浙予逆之于北關舟次閏五月九日先生移館于江頭以疾終于旅次予往弔之修撰君泣請銘不得辭案狀先生諱第元字正宇號篋圃考曰玉菴廌君妣溫太夫人初由徽州遷江西大庾縣水城孝友坊生而穎悟絕人年十三入縣學二十有六癸酉舉鄉試甲戌中明通榜選興安縣教諭丁丑成進士改庶吉士庚

辰授編修壬午副錢侍郎汝誠主江南試所取多讀書
窮經之士如江筠戴震者癸未充會試同考官乙酉典
山西鄉試丁亥授江南道御史巡視北城戊子視學湖
北辛卯丁父憂服闋甲午補掌四川道御史巡視中城
乙未轉掌江南道御史陞戶科給事中丁酉轉禮科掌
印京察一等巡視南城典湖北試巡南漕戊戌次子
衢亨殿試第一人是時君弟均元與兩子皆入翰林
一家四人爲詞林增典故焉是冬奉

命視學安徽明年陞光祿寺少卿晉太常寺少卿壬寅
丁溫太夫人憂服闋乙巳補太僕寺少卿丙午以疾致

仕戊申彭夫人卒夫人同里生以勤儉操作相夫窮達
如一教子嚴皆成大名晚精持誦梵典明年柩過杭先
生卒修撰君暨兄子嘉穀扶先生夫人之喪反葬于江
西先生起家寒素兄弟父子鏗振清華遞持文枋以根
柢淵源之學提倡羣雅而先生爲之杓首其貌溫溫綢
綢望而知爲長者長君齋心淨業先生晚而證道孳孳
日進惜乎未竟其志年逾耳順而遽長逝也先生生于
雍正戊申六月五日卒于乾隆己酉閏五月九日年六
十有二夫人生同年月其日二十有六卒前先生一年
十二月十四日年六十有一子二心亨乙未科進士翰

林院編修直 上書房先卒衢亨戊戌科一甲一名進士翰林院修撰 文淵閣校理直軍機處山西學政孫嘉穀女四女孫四某年月日合葬于某銘曰

德勝著漢經盈簾先生嚮龍世蓬瀛業自有子珠光熒厥季實大方間英看植華表雙翥丁

誥封朝議大夫王涵齋先生墓誌銘

乾隆庚戌余主會試榜發得無錫王生寰 廷試引見分發江西以知縣用生來謁曰寰有父年九十餘矣寰將乞終養又曰寰有叔父年八十與吾父杖几相從鄉人皆稱仁山涵齋兩先生巋然二老也是秋余奉

命撫皖時則寰之從兄侍御寬方主講敬敷書院相得甚歡及冬侍御告歸余畱之慨然曰吾弟舍祿仕而歸養安有違八旬老父而館于千里之外者哉吾將授徒鄉里以娛二老可矣余以其辭義甚正不可固畱惘然送之行又羨其兩世孝友不可及也今年夏侍御來皖請銘乃歎老成先後凋謝尤可感也案狀公諱千仞字啓丹晚號涵齋先世本江西裴姓明初有名昇字思裴者後于王始遷無錫遂爲王氏世家考諱繩曾雍正庚戌進士歷揚州江寧二府儒學教授配顧恭人生二子長仁山先生公其仲也爲諸生有聲諸鉅公皆待以國

士以經義教授弟子尤長于詩所著有詩比義述若干
卷與伯兄齊名老于南北聞者三十年及侍御昆季先
後成進士人以爲二老窮經績學之報也侍御官甘肅
公就養吟詠尤富及配秦恭人先逝歸而與仁山先生
爲鄉社耆宿常羊于古華梁溪間者十餘年嘉慶二年
丁巳十一月十七日夜半無疾而逝年八十有九生于
康熙四十八年己丑正月二十二日丑時

誥封朝議大夫兵部職方司郎中加一級配秦封恭人
子寬乾隆丙戌進士歷官兵部武選司主事員外郎職
方司郎中浙江道監察御史武庫司主事己亥科廣西

副考官甘肅狄道州知州調署秦州女一適同邑諸生
秦震清孫三保謨殤保訓保誠女孫二曾孫二令儀惠
華卜于嘉慶三年十月七日合葬于景雲鄉祖墓之右
銘曰

經之鋤厥子畚古華二皓相友于壺中橘中脫屣俱于
秋翀鶴盤松榆

知足齋文集卷第四